


程

程



綱目集覽正誤

上下二卷，明昆陵陽濟述。自<sup>後漢</sup>至<sup>宋</sup>通鑑全書，二百九十卷，惟胡三省音注，優于私家，第兩快浩繁，故字多誤，綱目五行，即集覽為綱目，而作，考多草率，涉虞、夏、三家、文、武、元、表、政、君、之、類，則誤不少。早安見者，未嘗輒用他書考正，四石，得條，間有標舉，而全注，其闕，其所不<sup>周</sup>者，遂一考補，久而成編，至今三十年矣。<sup>查</sup>如修政，以遺兒輩云，宜也。新舊優劣，揚士，亦為一序，成化，澤、安、古、吳、陸、鑑、校、以、國、學、板、補、失、為、葉、与、外、員、序。







綱目集覽正誤序



朱文公因司馬文正歎治通

鑑往綱目五十九卷大書為

綱方註為目其書則孔子往

春秋之義以正人心植世教

有助於治道者也方註既詳

而果言與事或出於突僻者



非淺眇所能遽通管王行卿  
嘗著集覽以授學者其意善  
矣然其間不無文選躄鷄之  
陋亡友名春坊贊善陳齊伯  
載爲正其謬誤四百餘事輯  
爲二卷名集覽正誤伯載學  
博識端於此書致力勤而歷

事多考據精切殆無餘憾有  
助於綱目者也其書故藏予  
家退陪

太師英國公孫安訥間論及  
綱目書公蓋深歎集覽之誤  
因出伯載所著公閱而是之  
曰宜廣其傳遂取梓行之嗟



手編目有闕沿道之書也  
載此編誠不可無者

太師公勳獲大臣政賢重濡  
之有榮而圖其不泯所存厚  
矣士君子有志冀

主茂民之道而欲稽古以擴充  
焉者是編豈小補之哉故爲

序諸簡首

宣德四季歲次己卯五月甲  
子榮祿大夫少傅兵部尚書  
兼

華蓋殿大學士廬陵楊圭奇序



通鑑綱目集覽正誤板在國學而人不之知也予  
友葉少宰與中以鄉友徐以道所藏本見示  
遂搜羣板中得焉中失數葉而文貞公之序  
盡闕予因補之以與同志者共焉

成化庚寅夏四月朔旦後學古吳陳鑑謹識

通鑑綱目集覽正誤按據羣書

周易

尚書

毛詩

周禮

禮記

春秋左氏傳

公羊傳

穀梁傳

國語

論語

孝經

孟子

戰國策

韓詩外傳

墨子

莊子

孔叢子


荀子

揚子

說苑

新序

史記





前漢書

後漢書

東觀漢記

謝承後漢書

漢官儀

三國志

魏畧

江表傳

晉書

南史

北史

隋書

唐書

肅宗實錄

五代史

通鑒胡三省音註

讀史管見

桓譚新論

文選

水經

唐律

昌黎文集

東坡文集

朱子語錄

大學衍義

宋朝郡縣志

元大一統志

桂海虞衡志

玉海

說文

字林

博雅

集韻

增韻

韻會

釋氏四十二章經

按資治通鑒全書二百九十四卷惟胡三省音註優於諸家第篇秩浩繁人不易致故學者多讀綱目王行卿集覽為綱目而作是以盛行於世惜其草率欠精繆戾為多如三家文若元表政君之類有誤初學非淺蚤歲閱習見有未當輒用他書考正無慮四百餘條



間有標舉而無註者闕其所不知固無足議  
亦為逐一考補久而成編至今三十年矣謂  
夫撫前人之短非謹厚者所為藏諸中衍不  
以示人歷年既久重加脩改義有所疑旁質  
同志索藁觀之時見與可力勸梓行亦不之  
許自念少好史學頗嘗究心每見集覽於網  
目不易曉處當釋而不釋者尚多甚欲別為一  
書通載詳註而力衰目昏不能着筆深為歿  
齒之恨猶慮一旦溘先朝露姑擬舊藁大字  
淨書以遺兒輩習之非有隱於人楚齊失得  
徒貽當世譏議云耳永樂壬寅正月上日識  
于北京寓舍

通鑑綱目集覽正誤卷上

後學

昆陵

陳濟述

第一卷

六卿並起三家輩出

集覽六卿智趙韓魏范中行氏也三家即趙韓魏  
也○今按三家正指魯大夫孟孫叔孫季孫之家  
趙韓魏已在六卿中不應復舉此義至為易見集  
覽開卷之初輒謬誤若此愚故不避僭踰而述是  
編也

質乎

集覽質音贄貨也○今按胡三省註質物相綴當  
也一讀如字謂摶質也質的也智伯怒必加兵於



魏如椹質之受斧質的之受矢也亦通

締疵

集覽締當作却音隙○今按締當作郝抽遲切古  
字多借用

飲器

集覽引晉灼云虎子屬漉便器也劉氏云酒器恐  
非○今按漢書匈奴傳云單于以老上單于所破  
月氏王頭為飲器者共飲血盟然則酒器是也若  
漉便器則不可盛血飲矣

君明樂官

集覽戰國策君明則樂官不明則樂音註樂音  
洛○今按樂如字言人君當明樂官擇人而任之

不必明樂音也

克君說

集覽連舉三字○今按克字當屬上文所與無不  
克五字為句克滿也言凡所賜與皆稱其功德也  
天子致伯

集覽秦孝公十九年天子始封爵為伯○今按秦  
自襄公救周送王東遷有功封為諸侯穆公伐晉  
秦秋已書秦伯何以曰孝公始封為伯也孝公十  
九年天子致伯乃方伯之伯周禮九命作伯謂諸  
侯之長也

以率受爵

集覽率與律同無註○今按韻書云率約數也猶



差等也

名田宅臣妻衣服

集覽引史記此句下有以家次三字○今按通鑑節去三字則此句當蒙上文各以差次四字通為一句

控拳

集覽引索隱云控捲而擊之○今按作拳擊說則與下文救闔者不搏擻意重孟康云拳與綦同區願切攘臂繩也漢書註攘臂猶捋臂也解雜亂紛糾者不控拳蓋以理亂絲為喻言雜亂紛糾者當徐解之不可急持拘捋也猶左傳言治絲而棼之

搏擻

集覽擻持戟刺人也○今按搏手擊也擻獨持也

批亢

集覽引索隱云亢拒也○今按亢本喉航字居郎切衿要之處也漢書婁敬云與人鬪不搯其亢拊其背未能全其勝也音義皆同批反擊也史記批其逆鱗亦謂龍喉下有逆鱗也此言批亢謂擊其要處也下文云引兵疾走其都即要處也若彼亢拒而我擊之則與擣虛之義不侔矣

開阡陌

集覽引正義云謂驛塍也○今按阡陌乃田間路徑如遂上有徑是陌洫上有涂是阡所以正經界也商鞅皆破開為田開乃開闢之開非開創之開此朱子說



未害為殺無罪以利已

集覽以未害為三字句絕言為此亦無傷也○今按此九字當為一句而貫下文言於殺無罪以利已仁者不為之義無傷也

四塞

集覽塞先代切○今按塞去心則切四塞四面皆充實也  
恫疑虛喝

集覽引索隱云虛喝喘息亦懼貌○今按喝高誘訓訶為是謂以虛詞訶脅也

使公子繇質焉

集覽引正義以疆質於弱之質音致弱質於疆之質如字○今按質字以疆弱分二音使在一句內

如左傳周鄭交質之類宜何音要之質子為質之質皆當讀若致

五官

集覽引曲禮天子之五官○今按田嬰告齊宣王乃諸侯五官禮記諸侯適天子命五官而后行註五官五大夫典事者諸侯有三卿五大夫即五官也已而厭之

集覽引戰國策註謂田嬰不得自厭○今按此謂齊王厭於聽覽也

鯁申差

集覽韓大將名○今按索隱云二將名當是曰鯁曰申差



鹿毛壽

集覽以鹿為地名○今按劉伯莊云三字人姓名國語鹿作唐

下甲

集覽猶言頓兵○今按猶田肯言下兵

難秦

集覽難猶畏也○今按難去聲猶難疑答問之難謂以文告之辭責之也

死者復生生者不愧

集覽使死者復更變生并見在生者並見傳王無變令我不愧之又引索隱云荀息受公命而立奚齊雖復身死不背生時之命是謂死者復生也生

者見荀息不背君命而死不為之羞慙○今按本意謂凡受人之託其人已死已為生者誠能不負所託假使其人再生已之生者無愧若負所託則有愧矣諺與荀息音同集覽索隱皆誤

雀生駟

集覽駟字韻書無之○今按說苑作鷓字林云鷓屬恐古字亦作駟

循太山

集覽循拊循其民也○今按循緣山而行也率西水滸導海而南之義非謂拊循其民也

惴惴

集覽引索隱云區區之義○今按惴惴恐懼貌詩



曰惴惴其慄

二垂

集覽引正義言極東西○今按是時極東為齊國非秦所有 垂疑指西與南蓋秦國在西先滅蜀又伐楚取漢中黔中南郡地

將勇者勝

集覽引索隱云將方來也○今按將者料度將然之詞

中國之處

集覽引戰國策註處上聲止也○今按處當讀去聲謂中國所在也

胥之人

集覽胥猶須也○今按須待也以負於魏

集覽負音佩○今按負如字亦通孤負也

第二卷

可殺而不可使處不完

集覽若處不完之地已寧可自殺○今按此謂將若有罪寧可殺之不可使處不完之地而致兵敗傷衆也

弄命者貢

集覽貢獻於上將○今按貢于國君

富貴而誣於人

集覽引禮記註克誣喜失節之貌○今按誣與屈



同勢相傾軋也

此辭反必為國禍

集覽此辭反為句言與理相反○今按此辭反謂還報也信陵君遣使謂安陵君生致縮高不然將伐之安陵君不從而曰云云故縮高言使者以辭還報信陵君必伐安陵是為國禍也

馬鹵

集覽馬或作片○今按馬本作馮馮土也周禮草人馮馮

邊不得田畜

集覽畜許又切○今按畜當作許六切養牲也下文大縱畜牧音同亦謂畜養牧放也

以其間

集覽君臣離間○今按間謂間隙

大王鄉臣

集覽鄉與嚮通護也○今按鄉謂意所嚮也

住建共者客邪

集覽客謂陳馳○今按齊人疾王建聽信姦人賓客不與諸侯合從以亡其國不專指陳馳也

微行

集覽若微賤之所為故曰微行○今按說文微隱行也

故楚南公

集覽南公楚人○今按故字猶言所以也非謂故



時之楚漢書無楚字

楚雖三戶

集覽以三戶為地名○今按三戶有二說以為地名恐是但於雖字文勢不順豈南公本指其地不欲顯言故為疑似之語邪餘如瓚說

戍漕轉作事苦

集覽漕轉水運也○今按胡三省註戍征戍也漕水運也轉陸運也作役作也史記下文有云請且止阿房宮作者減省四邊戍轉

縛衛令僕射

集覽縛衛令句絕謂衛士令士皆繫縛之○今按史記二世本紀趙高詐為有大賊令閭樂將吏卒

至望夷宮殿門縛衛令僕射曰賊入此何不止衛令曰周廬設卒甚謹安得賊敢入宮樂遂斬衛令李斯傳趙高詐詔衛士令士皆素服持兵內鄉入告二世曰山東羣盜兵大至蓋樂所縛者衛令及僕射當於射字句絕其曰賊入此何不止乃閭樂問詞非僕射語也趙高令士皆持兵內鄉即本紀詐為有賊之事令士一公平聲謂使令也非謂二等士也

無終

集覽燕郡邑在蔚州蠶狐縣址○今按項籍徙燕王廣為遼東王都無終其地當在遼東漢書地理志右北平郡有無終縣註古無終子國又後漢田



疇歸無終亦其地也

自食

集覽食讀曰飼○今按食如字

王孫

集覽引蘇林說如言公子蓋尊稱之○今按韓信釣於城下漂母必素識之信欲重報蓋非一飯其稱王孫安知非韓國之後邪

以親愛王

集覽止舉四字○今按以親愛一諸侯不平八字通為一句

所任愛

集覽所任皆所愛者○今按當謂所任用親愛者

帳御食飲

集覽謂御用飲食也○今按帳御謂帷帳及凡服御之具也

從燕趙

集覽從子容切約為從親也○今按從如字使燕趙服從已也

第三卷

亦望王

集覽王去聲○今按王如字亦望為王也

給曰左

集覽左字句絕○今按田父給曰左左兩字各自為句上左字田父欺令項羽向左去也下左字羽



從其言而向左去也

走月氏

集覽走去聲○今按走如字言月氏被擊而走去其國也

家人子

集覽庶人家之女子○今按漢書外戚傳昭儀位視丞相爵比諸侯王降至上家人子中家人子視有秩斗食云乃宮人名號也

不侵為然諾

集覽侵猶輕也○今按侵猶過越也

期期

集覽口吃故疊語○今按期猶必也

綺里季夏黃公

集覽綺夏姓也○今按綺里季夏一人也黃公一人也杜甫詩有黃綺終辭漢之句則固以黃為氏矣

信辟左右

集覽辟必郢切○今按辟音闢猶屏去也如孟子行辟人之辟

被佗書

集覽被之以書○今按被加也加於其身也

較若畫一

集覽引漢書較作講音校師古云和也○今按訓和不通當音覺明也揚子法言孔子之道較且易



司馬溫公音覺又孔光傳較然甚明皆當為明白  
易見之義

西甌駱役屬焉

集覽顏師古曰西甌即駱役亦曰駱越○今按漢  
書南粵王趙佗以兵威財物賂遺閩越西甌駱役  
屬焉師古註西甌即駱越不云即駱役西甌駱乃  
越之一種言其役屬於南越也漢書多有役屬字  
西域傳西域故皆役屬匈奴師古註服屬於匈奴  
為其所役使也又西南夷傳南越以財物役屬夜  
郎

馬牛羊齒已長

集覽猶言犬馬之齒○今按顏師古云謂老也蓋  
謂馬牛羊已老非指人也此承上文馬牛羊毋與  
牝而言馬牛羊皆已老不可供祭祀蓋祭祀之牲  
貴少壯肥腴故下文云祭祀不脩也諱言盡絕故  
但云已長春秋傳新序皆云馬之齒長矣亦謂馬  
耳

有如萬分

集覽謂其罪甚輕○今按此言假如萬分中一分  
有取長陵土者不敢質言故為儻或之辭猶言萬  
一有此事

說至降單于

集覽說至降為句○今按五字當為一句  
頸盤而加



集覽 鑿古戾字綠色綬也以綬加頸○今按漢書  
顏師古註鑿古戾字盧結切不戾其頸而親加刀  
鋸也與挨字通

固要上乃止

集覽 要劫也○今按要約勒也劫持之義說文以  
力止其去曰劫從力非刳奪之刳後放此

跪而推轂

集覽 推昌誰切言舉薦人如車轂之轉運○今按  
推吐雷切言天子親為推其車轂也與推轂薦賢  
之義不同

毋布車及兵器

集覽 毋得以布衣車乘○今按謂不以布蒙其上

也衣字去聲

露臺

集覽 臺以承露○今按恐以臺上不屋顯露為名  
非謂承露也

長沙王忠其定著令

集覽 著于令甲而稱其忠也○今按鄧展說是以  
吳芮異姓封王故特著令非專為稱其忠也

第四卷

天子世世獻

集覽 引韻會宗廟犬名羹獻犬肥者以獻○今按  
此但言祭獻不必指獻犬也

公共禁弗予



集覽引史記公作訟註公也又音容○今按公如字猶今言公然也

晁錯謂丞史曰

集覽丞史丞相史也○今按晁錯時為御史大夫則丞史乃御史大夫之丞及史也漢百官表御史大夫有兩丞侍御史十五人

誘天下豪傑白頭舉事

集覽特舉豪傑白頭四字引史記蘇代曰中國白頭游教之士皆積智欲離齊秦之交○今按豪傑二字當屬上文為句白頭二字屬下文言吳王白頭舉事也吳王時年六十二集覽引史記似以為誘豪傑白頭之士舉事誤矣

道軍所來

集覽道路從吳軍處所來也○今按臣瓚曰道由也去聲

先歷齊

集覽歷謂歷下○今按歷經過也由齊而盡濟北也下文曰齊曰濟北曰燕趙皆舉國名不應獨舉歷下之地

畢濟北

集覽畢了也○今按張晏云盡收濟北之地也

西山

集覽西山在隴西郡西縣○今按漢都長安自梁視之在西故大槩言西山謂西方之山也顏師古



註殺及華山也若西縣西山則過長安矣非也  
長君弟

集覽田蚡也○今按蚡雖王信異父弟時未甚得  
幸此指王皇后乃王信親弟也漢書鄒陽傳本文  
云長君弟得幸後宮天下無有可見其非蚡也  
人心不厭

集覽獸一瞻切服也○今按作入聲為優  
重犯法

集覽重難也○今按不肯輕易犯法也  
致用夏之忠

集覽致至極也○今按致用猶言取而用之  
不食於力

集覽力謂農民之力○今按不食於力非獨不自  
食其力蓋謂不使其家為勞力種植之事以收其  
利為食也亦不與民爭利之意故上文云所受大  
者不得取小也

顧力行何如耳

集覽顧念也○今按顧字在句首者有發語辭有  
反語辭有眷戀之意有當為但視之義者此處及  
顧王策安決耳之類是也

不根持論

集覽不根猶言不經以持論屬下句○今按嚴助  
傳朔臯不根持論上頗能優畜之顏師古註論議  
委隨不能持正如樹木之無根柢也



一日之樂不足以危無隄之輿

集覽引劉原父云不當作亦○今按不如字張晏曰一日之樂謂田獵也劉原父曰車輿馳騁必有顛危之變蘇林曰輿乘輿也不敢斥天子故言輿也言一日田獵之樂能樂何足以此而危殆無所隄障之車輿哉淮南王安諫擊閩越書云夷狄之地何足以為一日之間音閑而煩汗馬之勞乎即此意

廝輿

集覽輿主駕者○今按輿乃僕隸之屬賤者也左傳阜臣輿註輿眾也謂佐阜舉眾事也

王猶允塞

集覽引詩箋猶尚也宣王兵雖臨之尚守信自實滿○今按猶道也塞實也言王道信為誠實不用詭詐而徐方來歸也

丞史

集覽郡守有丞邊郡又有長史漢儀註丞史曰丞史○今按漢制郡守之屬有丞有諸曹掾史不必引漢儀也

謀事必就祖教政占古語

集覽特舉就祖教政四字註凡教政施令必就祖宗之舊規○今按就祖二字當屬上文為句發政二字屬下文言謀事必依就祖宗之故事發政施令必以古人之言占度其可否也



從行則迫脅衡行則中絕

集覽以利合為從以威勢相脅曰衡○今按此言擊匈奴深入長敵之難從行直行也衡與橫同集覽乃引合從連衡之義解之誤矣

審遮險阻以為其戒

集覽戒其侵掠○今按戒者戒其謹審也

被服造次

集覽造次謂所向所行○今按謂急遽苟且之時因能任官

集覽任而今切○今接任去聲因其所能任之以官也

羣臣遂

集覽言有次第也○今按遂却退也不躡進故為有次第

諸侯無境外之助

集覽臣無境外之交○今按徐樂本謂七國反叛隣境無同惡相濟者為助也與臣無境外之交義不同

上遣使即訊太子

集覽以子字句絕○今按即訊當屬上文為句太子屬下文言遣使者即就淮南訊之不逮詣河南也初雷被上書事下河南治

蒙

集覽如蒙去物上之蒙○今按如蒙去物上蒙覆



之物言易也

是日皆報

集覽以是日皆報殺五字為一句○今按劉原父以論決為報當於報字句絕殺四百餘人為一句把其陰重罪

集覽把在馬切○今按在字刊誤當作布馬切得可事論報至流血十餘里

集覽於至字句絕謂得可其奏而報至也○今按當以得可為一句事論報為一句至字屬下文論決日報與上文是日皆報義同言得可其奏而論決其事殺人之多至於流血十餘里也與嚴延年會論屬縣囚流血數里事相類

臣常有狗馬病力不能任郡事

集覽引本傳作臣常有狗馬之心註思報效也方甚也○今按綱目據通鑑本文節去之心二字則當以臣常有狗馬病為句力字屬下文謂筋力也諸侯相秩

集覽諸侯相秩真二千石俸月二萬是二萬斗也○今按漢官儀真二千石俸月百五十斛歲千八百石耳言二千者舉大數也

過右內史界中道多不治

集覽中道即馳道也○今按史記義縱為右內史上幸鼎湖病久已而卒起幸甘泉道多不治然則過右內史界中六字當為一句史記無之非謂中



道也

部吏

集覽謂督郵遊徼之屬○今按部猶統率也集覽  
蓋以部吏為所部之吏非也

尚樂

集覽崇尚音樂也○今按胡三省註樂音洛謂好  
尚逸樂也

第五卷

還至奉高泰山下東方

集覽下東方從東方而下也○今按史記上還至  
奉高令侍中儒者封泰山下東方如郊祠泰一之  
禮天子獨與侍中上泰山亦有封明日下陰道禪

泰山下趾東北肅然山然則本謂泰山下之東方  
非謂自泰山東方而下也

坐為姦利當族

集覽為去聲○今按為如字

適為兵

集覽適與謫通戍也○今按謫責罰也謫使戍邊  
曰謫戍謫不訓戍也

宜欲得當以報漢

集覽意欲立功以報漢○今按司馬遷傳作且欲  
得其當而報漢顏師古註欲於匈奴立功而歸以  
其當破敗之罪

沈命法



集覽沈汲也○今按沈汲也敢救匿盜賊者沒其命刊本誤為汲

臣下無復外家為據

集覽為去聲助也據太子名○今按此段五十餘處皆稱太子不應此處突出其名為當如字據者倚仗之義

辟彊守長樂衛尉

集覽辟彊為郡太守長樂為衛尉○今按楚元王傳霍光拜辟彊為光祿大夫守長樂衛尉漢制官吏初除皆試守滿歲稱職乃為真長樂宮名也宣帝紀顏師古註亦云謂長樂宮之衛尉也百官表云長樂建昌甘泉衛尉皆掌其宮師古註各隨所掌之宮以名官夫霍光專政或勸其納用宗室可

以免患故擇二人可用者官於朝何乃出辟彊為郡守乎集覽之誤明矣

私近子客丁外人  
集覽私近家臣也猶言私人○今按此謂私竊昵近之也

流庸

集覽流離庸調之人○今按庸與傭同謂流移他處及傭作於人者

羽林

集覽屬下句○今按林字句絕屬上文真西山大學衍義註郎羽林者宿衛之士謂郎及羽林也



畫室

集覽室中有武帝所賜周公負成王朝諸侯之圖  
畫○今按畫室謂彩畫之室成帝生於甲館畫堂  
註亦謂宮殿中彩畫之堂武帝使黃門畫周公負  
成王圖賜霍光安知又畫於室中乎

合和

集覽合音閤和去聲○今按並如字

目裁

集覽裁度也○今按裁猶引決謂自殺也韻書裁  
劑也

殺主

集覽殺與弒同○今按言殺者常詞究其義乃為

弒耳如字讀亦通

使者旁午

集覽引唐書註旁去聲○今按旁如字

道無從

集覽道與道通引也○今按道猶路也從由也言  
無由得貴其女猶張敞云其路無由也

欲自教舉不忍奏上

集覽以不忍奏上為句註不忍猶言不敢○今按  
當於忍字句絕霍光恐妻得罪不忍教其弒逆之  
事於是獄吏奏上光命勿論淳于衍恐辭及其妻  
也

田順不至期詐增鹵獲



集覽解詐字而連引不至期三字蓋以九字通為一句○今按當於期字句絕言田順不至所期之遠也初遣五將軍擊匈奴期以出塞各二千餘里田順八百餘里即止兵不進故云

誤相字於前

集覽誤道君字為相字於宣帝之前○今按顏師古註君前臣名不當相呼字於君前也

比況

集覽比必二切○今按比當作毗至切集覽於武帝元狩六年法比所音是也必二切乃比及之比臣敬頡於廣朝白發其端

集覽廣朝句絕○今按十字通為一句

書三上輒報聞

集覽輒止也○今按毛晃韻輒每事即然也此義近之不可訓止

人為徐生上書

集覽為助也○今按毛晃增韻為亦訓與此義近之不必訓助

以愛利為行

集覽謂愛人而安利也○今按謂以愛人利物為事也

專屬強壯蟲氣

集覽蟲讀如鋒○今按字既作蟲亦必兼取蜂蟻義蓋所用諸年少行事粹暴如蟲之羣飛螫人銳氣



不可禦也

守闕

集覽守去聲詣也○今按守如字謂守待而不去也

邑子

集覽謂同邑之子○今按此但謂同邑之人

自曾孫遭遇

集覽曾孫繫獄武帝遣使欲盡殺繫者丙吉閉門不納獲免故云遭遇○今按曾孫時雖獲免未為遭遇當指掖庭養視屬籍宗正以後事

故人下至郡邸獄復作

集覽復作復役工作之人○今按漢書宣帝號皇

曾孫生數月遭巫蠱事收繫郡邸獄丙吉為廷尉監憐曾孫亡辜使女徒復作趙徵卿胡組更乳養私給飲食視遇甚有恩註諸郡邸置獄治天下郡國上計者此蓋巫蠱獄繫故曾孫寄在郡邸獄復音服謂弛刑徒也有詔赦去其鉗釵赭衣更犯事不從徒加與民為例故當復為官作滿其本罪年月日律名為復作也

先零

集覽先音銑○今按漢書先字無音只作如字讀

第六卷

俗吏得任子弟

集覽任保也以父兄保任為官也○今按保任之



任平聲任子弟之任去聲用之也以父兄為官而任用其子弟也

中西域而立幕府

集覽引正義中竹仲切○今按中如字孟子中國而授孟子室朱子註當國之中也又中天下而立畏丞相指歸舍法令

集覽指歸句絕猶言指趣○今按指字句絕歸字屬下句謂長史守丞歸其郡國也

澆淳散樸

集覽淳酒水澆則薄木質割之則散○今按此但言風俗淳厚者澆薄質朴者解音散偽聲軼於京師

集覽軼與溢通器滿也○今按軼超過也

掾絮舜

集覽絮尼據切○今按漢書註絮女居切又音如竟致其死事會立春行冤獄使者出

集覽此事適會使者出蓋以死字句絕事字屬下句○今按事字當屬上句漢書張敞傳云云竟致其死事舜當出死敞使主簿告舜曰五日京兆竟何如乃棄舜市會立春行冤獄使者出云云與上文竟致其死事一句隔越不屬

平奏

集覽平謂無所可否○今按平猶評也博雅訂平也或云去聲平其不平曰平



信威北夷

集覽一說謂恩信威聲○今按信音伸為是

恂恂

集覽猶恂恂也○今按恂恂憂也恂當如說文訓  
忿也魯仲連曰棄忿恂之節

無慮

集覽註見唐明皇長興三年○今按集覽註見宋  
文帝元嘉六年愚謂無慮者言不用計慮可知其  
數也

奏草皆持東與王

集覽以草字屬下文○今按草字當屬上文奏字  
為句蓋以記房所說密語并所作求朝奏草二者  
皆持東與王若獨持奏草則不云皆也

財幸

集覽財猶僅也○今按財與裁通裁擇而幸從其  
言也見漢書賈誼傳註

中嚴鼓之節

集覽嚴鼓莊嚴鼓節也○今按嚴謂急擊也

中山王與太子游學相長大

集覽相長大言與太子長大相等○今按長字上  
聲顏師古曰同慶長養以至壯大也

天下莫不歸心臣子

集覽仲馮曰臣子宜屬下句○今按史丹傳臣子  
下有見定陶王雅素愛幸一句故仲馮以為宜屬



下句綱目節去此句而臣子二字一本改作太子  
豈朱子意邪刪去二字尤順

倚異政事

集覽依物曰倚○今按谷永之意以灾異為偏寵  
無繼嗣之故而帝乃倚以為政事所致也

抗湛溺之意

集覽湛讀曰沉溺於酒○今按湛與耽通樂之過  
也說文作媵字從女谷永正指湛溺女色非謂溺  
於酒也抗者用力克去之義

解偏駁之愛

集覽謂不周普也○今按偏者不周普也駁者雜  
而不純固不可偏而亦不可駁也

壹受詔如此

集覽壹猶言初○今按壹與大學壹是同義猶一  
切也

未曉大將軍

集覽言未曾令王鳳之知○今按之知當作知之  
言未曾曉諭王鳳知之

物盛必有非常之變先見為其人微象

集覽見形句切為去聲言先前災異之見蓋為其  
人而微示其象○今按先見屬上文為句為如字  
言凡物之盛必有非常之變豫先著見以為其人  
之微象也

第七卷



處勢高敞

集覽處所地勢○今按處上聲謂所處之地勢  
星隕如雨

集覽如而也星落而且雨○今按星隕如雨言其  
多也春秋夜中星隕如雨劉氏曰左傳云與雨偕  
也非也穀梁以如猶而言星隕且雨亦非也春秋  
紀星隕為異夜中而雨何足紀乎

庶幾

集覽幾讀曰冀○今按幾只作平聲

勅過交道廐者勿追

集覽舊有此勅○今按當時勅戒所使收谷水之  
侍御史如永已過交道廐則勿追非舊有此勅也

大雅所以流連也

集覽流連者即緘撲勉勉我王之意○今按大雅  
詩云文王曰咨咨汝殷商式號式呼俾晝作夜註  
咨嗟歎也殷商紂也大雅詩人設為文王歎紂之  
言也漢書顏師古註流連言作詩之人嗟歎而泣  
涕流連也蓋如賈誼可為太息流涕之意不謂飲  
酒之人說者以為流連荒亡失之矣集覽尤謬  
以奸忠直

集覽奸犯非禮也○今按奸與干通以干忠直之  
名也漢書多作奸劉向傳以奸名譽即尚書以干  
百姓之譽言之干

索賄和



集覽引劉原父說以隨和為珠玉○今按和去聲當依梅福傳註李奇曰求索與己和及隨己者上文云淮南反不敢和從此則索隨和者事正相反王少而父同產長年齒不倫

集覽以長字屬下句言比及長大則又與姑之年齒不相等倫○今按父同產三字即謂姑也下文又云父同產亦有耻辱之心長字當屬上句父同產長四字正與王少二字相對猶言王少姑長也徵舒崔杼之亂

集覽止云二人弑君不及谷水所言本意○今按谷水之意以成帝與群小媒黷輕身獨出飲食臣妾之家故引二事為證左傳陳靈公與孔寧儀行父通於夏姬皆衷其相服以戲於朝又飲酒於夏氏公謂行父曰徵舒夏姬子也似女音對曰亦似君徵舒病之公出射而殺之齊崔杼取棠公之妻莊公通焉驟如崔氏以崔子之冠賜人杼稱疾公問之遂從姜氏

尸位

集覽尸主也○今按尸如祭祀之尸謂居其位而不為其事但飲食而已

重致遠人

集覽言遠人之難致○今按言以能致遠人為重也

請車騎



集覽求車騎之官○今按是時淳于長已得罪遣就國王立嗣子融安得從長求官所請車騎乃車馬也故長又以珍寶重遺之

繼四父而輔政

集覽四父譚音商根○今按四父謂鳳音商根皆莽諸父也王譚倨不事鳳而音卑恭如子故鳳薦音代已後譚卒上悔前廢之及音卒遂以譚弟商代商卒以根代根免乃及莽譚實未嘗輔政輒不為王氏及丞相御史所持

集覽不作下註云一本誤作不○今按劉向傳正作不顏師古註持者扶持佐助也

墨氏二本

集覽二本謂不得其正○今按二本義見孟子集註謂人物之生必各本於父母而無二今墨子兼愛視其父母無異於路人是二本矣

竊以日視

集覽以近日私竊視陛下○今按日乃日月之日上文云君不修道則日失其度晡昧無光故云竊以日色視之知陛下志操衰於始初也

無彊所惡

集覽不可令惡人彊盛○今按惡字去聲言無令所可惡之人彊盛也孟子云可欲之謂善則所惡為姦惡可知集覽便以惡為惡人而不音去聲則非



決之使道

集覽令引歸故道也道讀曰道○今按道如字使道使得其道也如禹貢九河既道之道

增卑倍薄

集覽倍讀曰陪倍之令厚○今按倍如字倍加也苟有功德則宗之

集覽引胡氏曰是為人子孫得選擇祖考○今按胡氏本程子說朱子嘗辯其非不必援以為說

其尸服以士服

集覽尸王也主祭者所着之服○今按古者祭祀必有尸尸神象也上服字猶衣聲也謂以士服服其尸也禮記父為士子為天子諸侯則祭以天子

逆遣

集覽逆謂上書謂奏上而遣之○今按逆遣猶言預遣班超未至而先遣田慮故曰逆遣安帝延光二年荀淑逆曰云云集覽註逆迎也迎先便說此義為近若以逆為上書何不直云奏遣乎且班超已至疏勒又何暇上書于朝而遣吏乎下文勅慮乃超戒勅之非詔勅也

請行前

集覽又引終軍傳註行下郎切○今按行如字

第十卷

綠襦

集覽襦當作鞬韋韜其袖恐汙食飲○今按鞬單



衣也故云衣去聲時蒼頭必多未必皆以韋韜袖

楚王好細腰

集覽引戰國策靈王好細腰楚士約食○今按墨子亦云靈王好細腰而國多餓人此言宮中多餓死恐但謂婦女耳

長君退讓之風

集覽長君謂馬援也○今按文帝立竇皇后后弟廣國與兄長君厚賜田宅家於長安周勃灌嬰等為選士之有節行者與居兩人由此為退讓君子不敢以尊貴驕人今馬廖等皆太后后兄故楊終引竇長君為比非指援也

陰鳴

領宿衛供養行內署門戶省服御食物

集覽引顏師古說行內謂行在所之內中○今按此說非也行內署門戶五字當為一句行去聲巡視也謂循察內署之門戶也省息并切師古曰視也

第八卷

黃郵

集覽不註所在○今按南陽郡新野縣有黃郵聚臣等已無可言

集覽引王若虛說蓋云不足道也○今按王舜意謂固知不可但事勢如此無可說者

大啓九國周匝三垂



集覽東西南三邊○今按漢都長安在西當謂東  
南北三邊九國者燕代齊趙梁楚吳淮南長沙也  
於其所之縣官除其本計其利

集覽縣字句絕之適也○今按史註不敢指斥天  
子謂為縣官此云縣官猶今言官司公家也於其  
所之當為一句謂所適之處也食貨志作於其在  
所之縣官多一在字謂所在處之縣官也下文複  
出縣官字集覽破句專指所適之縣非也

獻登其廟

集覽引食貨志餘三年食進業曰登○今按此但  
謂祭獻登上其廟耳當依王莽傳及通鑑本文作  
獻祭其廟

縣宰缺者數年守兼 切會殘日甚

集覽以守兼一切為句○今按縣宰缺久不除補  
他官權守兼攝如平義為安陽尉守安陽令也當  
於兼字句絕一切屬以下句

調發諸郡兵穀嘗民什取其四

集覽於民字句絕○今按當於穀字句絕嘗民屬  
下句漢書嘗上有復字顏師古註發民嘗財什取  
其四也

臨淮瓜田儀等

集覽瓜今瓜州渡○今按瓜非地名服虔去姓瓜  
田名儀

揚雄三世不徙官



集覽雄歷仕哀平孺子嬰○今按雄自成帝時奏  
賊為郎給事黃門三世正謂成帝哀帝平帝也及  
王莽篡位乃以耆老久次轉為大夫不數孺子嬰  
也

劇秦美新之文

集覽劇戲劇也○今按又選載揚子雲劇秦美新  
文篇內歷叙上古三代而曰獨秦屈起西戎云云  
二世而亡何其劇歟註云劇甚也題曰劇秦美新  
蓋以秦皇無道為甚而美新莽之德也

鉤牧車屏泥

集覽鉤取其車而棄諸泥塗中○今按屏泥車上  
器屏蔽泥者謂鉤取州牧所乘車上之屏泥也黃

霸傳別駕主簿車緹油屏泥於軾前

按章豫州

集覽行豫州按察憲章○今按漢書顏師古註有  
上章相告者就而按治之

二科

集覽謂飢與寒也○今按王莽傳大者群盜小者  
偷穴不過二科非謂飢與寒也

郡縣力事上官

集覽郡縣中出力服事之長官○今按此謂郡縣  
盡力奉事上官應塞詰對也

宜秋

集覽無註○今按李贄曰宜秋聚名在泚陽縣續



漢志南陽平氏縣有六丘秋聚

定會

集覽訂定盟會○今按謂期定同會者

婦子係獲

集覽以為臧獲也○今按此但謂婦子皆被係累

虜獲也

虞帝七首

集覽莽自謂虞舜且其始祖故名之曰虞帝七首

○今按此蓋莽有七首妄稱為虞帝者非以始祖

故而名之也

四父

集覽誤註說見前

我得專封拜

集覽封拜封侯拜將也○今按劉秀大槩言得自

除官不必專指封侯拜將

寬譬

集覽寬緩譬匹也○今按謂設為辭諭寬解之

竈下養

集覽炊烹為養○今按兒寬為弟子都養謂主給

事烹炊也

城頭子路

集覽引正義曰地名也○今按是時爰曾字子路

起兵盧城頭故號城頭子路有衆二十餘萬子

都有衆六七萬故劉秀欲依之



犇命兵

集覽犇命來歸之兵也○今按漢書昭帝紀益州夷反註應劭曰舊時郡國皆有材官騎士以赴急難今夷反常兵不足以討之故權選取精勇聞命奔走故謂之奔命李斐曰言急也顏師古曰犇古奔字

彊華

集覽人姓名彊其兩切○今按集覽本李賢註姓譜彊其良切

城陽景王

集覽漢武封城陽頃王子劉買於枸景王淑於○今按漢書諸侯王表齊王肥之子朱虛侯章文帝

封為城陽王即景王也傳兵三喜頃王延敬王義惠王武荒王順又王子侯表元帝封順子憲為武侯傳哀侯霸無後成帝以霸弟萌紹封十九年免集覽引頃王子劉買不知其故淑於二字上下有脫誤

檀鄉

集覽地闕○今按地在山陽郡瑕丘縣東北賊初起於此因號焉

第九卷

要馮異

集覽要去聲○今按要平聲亦訓約論語久要是也此為邀而約之之義下文要其東則邀遮也



傭中佼佼

集覽佼佼好也言凡庸之人稍為勝者○今按佼佼疑與狡通謂如傭作人中之狡猾者

交讓完

集覽無註○今按此蓋講賓主禮相見之冠

徼一時之勝

集覽徼倖也○今按徼只訓要求中庸行險以徼幸亦謂要求幸得如此也

質漢歸

集覽質如字○今按彭寵後弟子后蘭卿為質子於漢而歸質當音致

王者有分土

集覽王于況切○今按王只如字

自適已事

集覽謂宜自謀順適己身之事○今按此言唯欲便適自己之事而已如集覽說則指竇融矣非也臣願與坐雲臺之下

集覽與讀曰豫○今按與上聲欲與周黨等坐於雲臺下而考試也

人皆欲為君事耳

集覽事耳為句猶言分內事○今按此言倉卒之時人皆欲為君所為之事君指公孫述集覽似以人皆欲為君五字為句而事耳二字自為句非也負虛交



集覽與人交而不誠實○今按負猶恃也言倚恃  
虛交指子陽文伯也

咋舌

集覽咋舌不言貌○今按咋與齧通齧也前灌  
夫傳齧舌自殺

深自降挹

集覽挹義與抑同○今按胡三省註以器俯而取  
水曰挹故為謙下之義

從容一處

集覽從容音總之勇○今按從七容切容如字安然  
自在之意

彭上劉隆為南郡太守

集覽上登進也○今按上請而命之也

出兵綴公

集覽綴牽引之義○今按綴猶羈絆也  
不厭民心

集覽厭一贍切○今按厭只作入聲

傳奏于左

集覽傳讀與敷同○今按傳音義當與附同

守闕

集覽守詣也○今按守不訓詣解見前第五卷

恕己量主

集覽恕己諉其責於己○今按謂能推己之心以  
度人也



知我必不有所左右而輕天下

集覽引七制解光武謂憚知義廢后必無所偏徇而輕視天下也○今按此謂必不偏愛而動搖國本也太子彊乃郭后所生恐后既廢併及太子以禮讓相厭

集覽厭勝也 ○今按厭服也

置質

集覽質如字 ○今按質謂質子也音致

以厭海內之望

集覽厭服也望怨也○今按厭塞也滿也望願望也

公朝訪逮

集覽訪逮謂訪問時政也○今按逮及也訪問之

及

見事

集覽謂常見之事○今按見當音現見在之事即常見之事也

所處

集覽猶言方所○今按處上聲謂靈臺所宜處之地也

上無天子

集覽引公羊傳註○今按此因光武初崩故云與公羊註義不同

即遠而無退



集覽就使墓遠亦須送至而無退却○今按禮記曾子吊於負頁主人既祖推柩而反之子游曰飯於牖下小斂於戶內大斂於阼殯於客位祖於庭葬於墓所以即遠也故喪事有進而無退註謂喪事一節遠於一即有進而往無退而還豈可推柩而反之乎愚謂即遠者漸就于遠也集覽誤祿養終厥身

集覽養去聲○今按下奉上曰養如養父母之養則去聲人君養賢之養只作上聲

閉督郵府內

集覽於府字句絕云閉其府門○今按府字當連內字為句督郵乃督察屬縣事務者九江無事催督故閉督郵於府內不令妄出也

要致漢使

集覽要劫也○今按要猶邀求也

萬分離析

集覽萬分言多端也○今按萬分猶言萬分之一也唯食租如故使相中尉謹宿衛之

集覽唯食租如故使相七字為句○今按唯食租如故五字句絕下文十四年楚王英男女為侯主者食邑如故文義同使相屬下句使字上聲相謂其國之相也

伯夷

集覽載伯夷姓名○今按伯夷叔齊姓名皆



後人偽撰不可信也

五毒

集覽引師古說項與手足俱加木也○今按李賢曰四肢及身備受苦楚也或云鞭箠灼微纏及釋文以為毒草皆非

朗陵

集覽屬陽安郡○今按此陽安屬汝南郡非蘭州也詳見第十三卷

物色

集覽畫建等物色○今按物色謂形狀也耿建等未嘗與顏忠王平相見必不相識故以建等形狀問忠平不能對則知其詐也

諸侯其尸服則士服註云祭用生者之禮盡子道也尸以象神自用本服若如集覽之說則是天子諸侯主祭者服士之服可乎

未忍考于理

集覽謂不忍考竟其罪而盡理也○今按理法也未忍考致于法也

數禱祠解

集覽解音懈○今按此為解釋禳除之義今人多讀作上聲

此乃中語

集覽乃中猶言彼中○今按馮太后謂當熊之事外人不知此乃宮中之言語也



母將隆

集覽九母將覆姓母音父母之母○今按玉海姓氏  
急就章母將註母音無

善閔子騫守禮不苟從親

集覽閔子騫執守禮體不苟且於從親○今按子  
騫閔損字也後母衣所生子以綿絮損以蘆花絮  
父察知之欲出後妻損曰母在一子單母去三子  
寒乃止疑即此事謂不從父命出母也孔子嘗稱  
之曰孝哉閔子騫人不間於其父母昆弟之言  
忿邑非之

集覽邑於邑○今按文選註猶歎息也楚辭也作  
悒

集覽陰於禁切喝一介以猶噎塞也○今按陰如

字喝許曷切訶也亦作悒史記恐悒諸侯謂相恐  
脅也

何用愈趙高

集覽用以也愈差也○今按愈猶勝也言與趙高  
等也

自將徒

集覽自將親自將領也○今按不必言司空親自  
將徒此但謂官司自備工徒脩理不役民夫耳

黃髮無愆

集覽黃髮猶言黃耆也○今按書秦誓尚猷詢茲  
黃髮則罔所愆註黃髮賢老也言謀于黃髮之人



則行事無所過詔意則謂朱暉等賢老之人無過也

及後恣已忘其前善

集覽以已忘其前善五字為句蓋讀已字為已然之已○今按及後恣已四字當為句言恣其已之欲也

親揚其先君之惡以唱管仲

集覽齊襄公無道被弑桓公得立厚禮管仲以為大夫此是親揚先君之惡以唱管仲○今按集覽援引雖詳而不見親揚其惡之事國語魯莊公束縛管仲以與齊桓公公迎而問焉曰昔吾先君襄公築臺以為高位田狩畢弋不聽國政卑聖侮士

而唯女是崇食必梁肉衣必文繡戎士凍餒是以國家不日引不月長恐宗廟之不掃除社稷之不血食敢問為此者何管仲乃對以致霸之術云云

度遼

集覽謂將軍吳棠○今按後漢書南匈奴傳明帝永平八年始置度遼營以吳棠行度遼將軍事章帝建初七年坐事免以張掖太守鄧鴻為之和帝永元二年鴻遷大鴻臚以皇甫稜為之今章帝元和二年勅度遼則鄧鴻也

迷吾

集覽迷吾須良之孫○今按須當作滇後漢書滇良燒當之玄孫子滇吾滇吾子東吾東吾諸弟迷



吾等則滇良之孫也

堯作大章一夔足矣

集覽樂記註夔舜時典樂者家語陶唐夔龍典樂按此則非止一夔亦與樂記不同○今按堯時夔已與樂舜蓋申命之耳自書稱伯夷讓于夔龍後世多連言之未必龍亦典樂書曰龍作納言

西平王羨

集覽羨以淺切○今按漢書無音當讀如字

納質

集覽質如字○今按質當音致

遲留

集覽並去聲○今按只如字讀謂遲緩淹留也

蕩佚

集覽引揚雄傳佚蕩音鐵謹○今按蕩如字佚音迭方言佚惕緩也惕與蕩通大槩寬大舒緩之意

選懦

集覽無註○今按李賢曰選懦慈戀不決之意史記律書選懦觀望索隱云懦音軟選懦謂動身欲有進取之狀前漢書杜欽曰議者選與音義柔怯也與與懦通此云選懦之恩蓋謂柔怯不能斷制是以留諸王於京師不遣就國也懦亦當與與通並音軟

特贊

集覽作持贊無註○今按贊即贊拜之贊朝見之



時不與群臣同贊而特贊也與下文三公絕席同意持字刊誤

四府

集覽太師太傅司徒司空○今按當謂太傅太尉司徒司空見後漢書百官志集覽第十二卷今之四公條下所引是也

鬱養彊熟

集覽鬱滯也彊勉也○今按此謂蓄火上中蒸鬱而養之彊使其熟也彊上聲熟古熟字

追尾

集覽引童懷曰尾猶言尋○今按尾謂隨其後也乃上遣行長史

集覽上奏而遣之行也○今按行長史謂索班行長史事未為真也

九德未事

集覽言有德者未見其所行之事○今按此言不任用九德之人行事也

甘陵之思

集覽謂嫡母耿姬○今按安帝追尊其父清河孝王曰孝德皇皇妣左氏曰孝德后乃所生母也又尊陵曰甘陵尋尊嫡母耿姬為甘陵大貴人集覽於甘陵之思不及其父母而獨舉耿姬何也

須行還

集覽行下孟切○今按行如字



柴門

集覽柴讀曰寨籬落也又引廣韻山居以木柵○  
今按此謂塞斷其門不通出入也

西鍾下

集覽無註○今按謂西廂下懸鍾之所也晉書項  
城府君謂賈充曰當使係嗣死於鍾簾之間及趙  
王倫亂充子謐走入西鍾下就斬之

格殺登

集覽相抱而殺之曰格○今按格本作格擊也集  
覽第九卷註云不用器械而白手殺之此說蓋是  
後放此

第十一卷

傳考

集覽傳音轉○今按當作株戀切

不訾之身

集覽引正義言賞財富多不可訾量○今按此言  
身命至重不可量也

范升之詆毀

集覽引范升論立左氏博士事○今按光武建武  
五年范升奏處士周黨等偃蹇驕悍釣采華名等  
語即此事也集覽誤甚

觀政亭傳

集覽止釋亭傳之義○今按胡三省註郡縣長吏  
飾亭傳以全過使客監司亦以是觀政也



寬其負筭

集覽引景帝詔廉士嘗筭四得官○今按李贇曰負欠也筭口錢也儒生未有品秩故寬之

司隸乘風按之

集覽乘風姓名○今按漢書龐參傳及通鑑本文及別本綱目皆作承風謂承望風指也司隸因龐參為左右所毀故乘風案之也如作乘風亦通猶言乘勢謂為姓名則非

刑德八柄

集覽刑德無註○今按德猶恩惠也書盤庚以動用非德與動用非罰對言又曰用罪伐厥死用德彰厥善說者謂用德猶言用賞與此德字義同八

柄爵祿予置生五者德也奪廢誅三者刑也

詣理

集覽理猶言理直○今按古謂治獄官為大理詣理謂往法司辯對也

吐鄉之事

集覽鄉去聲○今按鄉如字

爾道為貴

集覽爾與邇通近也○今按爾猶汝也鍾皓指謂兄子瑾以其所行為貴也

任章之謀

集覽無註○今按宣帝時霍氏外孫任宣坐謀反誅子章亡命居渭城界中夜玄服入廟居廊間執



戟立於廟門待上入欲為逆教覺伏誅  
快不自覩

集覽快他沒切○今按韻書快又陀骨切當為急  
忽之義

政令垢玩

集覽垢惡也○今按垢汙壞也玩與翫通狃狎也  
密如

集覽靜貌○今按李賢曰猶言密如也言其嚴密  
不散縱密如句絕

千戚之舞

集覽高帝被匈奴圍在平城豈此文舞所能解○  
今按帝舜命禹征苗苗民逆命帝乃誕敷文德舞

千羽于兩階七句有苗格雀寔之意實指此而言  
時勢不同也

皇路

集覽皇大也○今按李賢曰皇路天路也書云遵  
王之路

以充王府用

集覽用字當屬下句○今按當屬上句  
左回天

集覽文帝時張公謹論事有回天之力今以喻左  
官○今按唐太宗貞觀四年設卒脩洛陽乾元殿  
張玄素諫詔即傳之魏徵歎曰張公遂有回天之  
力集覽誤以太宗為漢文帝在前故云今以喻左



惟不知既非漢文帝亦非張公謹也此但言左惟  
勢力能回人主之意耳

貧王侯半租

集覽貧音恃○今按貧當音忒集覽蓋音恃而刊  
誤為恃也

隱不違親

集覽引師古曰介子推之類○今按集覽所引新  
序韓詩不足為證左傳僖公二十四年晉文公賞  
從亡者介之推不言祿祿亦弗及其母曰亦使知  
之若何對曰言身之文也身將隱焉用文之是求  
顯也其母曰能如是乎與女偕隱遂隱而死註曰  
母子俱隱至死不出所謂不違親也

貞不絕俗

集覽引孟子不羞汙君不辭小官○今按柳下惠  
曰爾為爾我為我雖袒裼裸裎於我側爾焉能晚  
我哉故由由然與之偕而不自失焉援而止之而  
止此正不絕俗之事集覽不引為證何也

固天下良田美業

集覽固必取也○今按固如求母固之固猶強占  
也晉書刁氏專固山澤為京口之患

截趾適屨

集覽無註○今按截趾適屨孰云其愚何與斯人  
追欲喪軀皆所引之辭適猶稱也就也言屨小而  
截趾以就之猶未足為愚何如貪逐淫欲以喪其



軀之人其愚尤甚於截趾也

浮屠不三宿桑下

集覽以桑下為詩之桑中○今按釋氏四十二童經云沙門受道法者日中一食樹下一宿慎莫垂笑又大智度論十二頭陀八樹下坐九露坐註云樹下思惟求道猶如半舍尚生著故故露坐也夫沙門於樹下唯止一宿慎莫再宿即不三宿之意恐久則愛戀之心生矣

第十二卷

軍不內御

集覽言軍便出也○今按此言軍中事一聽主將之命不從中制御也

皇甫豔妻

集覽皇甫字也豔妻幽王后也○今按此見詩小雅十月之交云皇甫卿士又云豔妻煽方處朱子傳皇甫佞卑而權重豔妻即褒姒也言小人用事而嬖妾蠱惑王心以為之主也

蘧伯玉耻獨為君子

集覽無註○今按謝承後漢書王暢誅劉表亦有此語未詳所出蓋世人相傳之辭不見逮及

集覽逮謂訪逮○今按謂任用不及也

斷絕尺一

集覽斷絕謂不得頒降也○今按詔令難於斷絕



欲其謹慎不輕發也

冀昌

集覽地名在冀州境○今按冀字句絕昌屬下文即刺史左昌也漢書地理志天水郡有冀縣明帝改天水為漢陽上文蓋勳即漢陽長史也

楚楚

集覽鮮明貌○今按似理悽愴苦楚之意承上文先帝新棄天下而言

依省內

集覽上聲○今按依如字何附也

歎迫永樂宮

集覽行平易也○今按此以行平易之義無取當

與盛通謂促迫也

坐不闕堂

集覽闕傾頭門中視也○今按坐不闕堂言愛惜身命也堂高廉遠地闕視恐墜墮即坐不垂堂之

義

麋沸

集覽麋糝也○今按麋即粥也李賢曰如麋粥之

沸

仰我鼻息

集覽言其易與也○今按仗我呼吸之力也

皆頷袁氏

集覽頷念也歸也○今按頷欲也



格物

集覽格廢格之格音閣○今按格謂標品之也  
士孫瑞

集覽姓士名孫瑞○今按後漢書王允傳士孫瑞  
字君策下文凡兩見皆止書瑞然則士孫蓋覆姓  
也魏有樂陵太守士孫德祖  
數年間至五千餘家

集覽間至屬下句猶言近也謂近間來附從者至  
五千餘家○今按間字當屬上句言百姓歸之數  
年之間多至五千餘家

第十三卷

貢與邈等分非素結也

集覽等分等間交分也○今按此言郭貢與張邈  
呂布等諸人其交分非素相結者當於等字句絕  
分字屬下句

以將軍之神武與文若昱等收而用之

集覽特舉神武與文四字註云聖而不可知謂之  
神威之可畏謂之武英華毅外謂之文○今按集  
覽以神武文為三德似於文字句絕非也文若乃  
荀彧之字與文二字當屬下句

百姓與能

集覽引程朱傳義與音預百姓預能言他無知因  
卜筮便會做得事便是與能○今按與字易說有  
上去二音孔融所引則當如字劉備言可以徐州



與袁術融等不從故云今日之事百姓視能者而與之

從兄賁

集覽賁音奔○今按孫賁字伯陽周易山下有火賁為文明光飾之義恐當音秘

露次曹陽

集覽露次猶言露室也○今按露猶暴露次猶止舍也左傳凡師再宿為信過信為次謂駐軍于野不居屋下也

神亭

集覽無註○今按在鎮江府丹陽縣界斷以自入

集覽斷而入己○今按斷音短猶截也

中央不合大如礪

集覽言如砥礪之堅○今按如礪言其小也猶泰山若礪之意

以清王軌

集覽軌謂法度也○今按王軌猶言王度王路大抵指王室而言

豉望

集覽豉音岐○今按豉與企同舉踵以望也去智切詩豉予望之

多端寡要好謀無決

集覽多端多謀也○今按多端言事緒多也



當塗高

集覽公路之義○今按當塗高乃曹魏之譏周禮象魏闕名蓋闕中通門為道其上懸法象其狀巍然高大故謂之象魏衮術字公路術亦邑中道近於當塗之義故誤認為已兆也

布性決易

集覽性不定也○今按決易猶之口決意變易不復致思也

眊固

集覽眊音携○今按玉篇胥規切者人姓其音携者目深惡貌集覽第二十二卷眊邃息為切與胥規切同音

領之

集覽音肯也又搖頭也○今按搖頭不肯也與首肯正相反當以前說為是

海昏上繚

集覽無註刊本上誤作工○今按海昏上繚二縣名屬豫章郡水經註繚作僚音同

京中

集覽公孫瓚築京○今按說文京人所為絕高丘也先是瓚築京高十丈以居京中即其中也

椒丘

集覽不註所在

撓心交臂



集覽引本傳作撓心於邪儒之說交臂於陵肆之徒○今按此本三國志華歆傳註文交臂猶言手相接也莊子交一臂而失之言華歆為虞翻所說枉撓其心而與絲策相見相接也

### 陽安都尉

集覽陽安今簡州在成都路○今按簡州雖亦名陽安時屬劉璋非曹操所及此乃汝南陽安也集覽殊誤後漢書郡國志汝南郡陽安註云獻帝初平三年分二縣置陽安都尉朗陵亦汝南縣分屬陽安故下文朗陵長云云也

### 送質

集覽質如字○今按質當音致

### 劇縣

集覽云註見光武建武三年○今按集覽元建武二年註劇菑川國邑乃齊地也孫權所討乃江南山越劇非縣名謂繁劇艱難之縣也

### 料出兵

集覽料數也○今按料如字點閱見數也宣王料民之料

### 子布元表各顧妻子

集覽下言於上曰表謂當元所言也○今按張昭字子布秦松字文表此作元表蓋本虞溥江表傳孫權曰子布元表諸人各顧妻子恐文誤作元或一字元表也及考二國志呂蒙傳孫權曰孟德張



言率衆水步俱下子布文表俱言迎之通鑑建安二十四年亦載孫權云孟德率衆俱下張子布秦文表俱言宜遣使脩檄迎之二書皆作文表又江表傳云曹公責孫權任子張昭秦松等猶豫不能決周瑜曰不如勿遣亦一證也集覽綴不知元表為秦松之字獨不詳各字之義乎孫權若責子布一人何以言各顧妻子也

第十四卷

故在濟南

集覽故謂舊日也○今按故承上起下之辭猶言所以也

連兵相事

集覽相事共事也○今按言相與從事也

刺船

集覽刺音辣○今按刺船之刺音戚从束其音辣者乖戾也从約束之束

陸口

集覽無註○今按水經江水迳烏林南又東右岸得蒲磯口即陸口也孫權分長沙立漢昌郡在岳州湘陰縣界以陸遜為郡守屯陸口

因而歷之

集覽歷服也○今按歷竿也當為臨迫之義左傳楚晨歷晉軍而陳

如何可置



集覽置怨也○今按置猶捨也捨而不問也  
侏儒觀一節之驗

集覽無註○今按桓譚新論侏儒見一節而長短  
可知侏儒短人節謂肢節言不必見全身但觀一  
節之短可知其為侏儒矣

刺姦

集覽註見宋孝武孝建元年○今按刺姦官名以  
刺舉姦惡為義漢書王莽傳置執法左右刺姦光  
武中興亦置刺姦將軍又公府有刺姦掾

十鼠同穴

集覽無註○今按魏主指謂鮑勛及三官已下諸  
人皆殺之今作一處死如十鼠同穴也劉聰怒陳

元達諫起殿言曰不殺此鼠子朕殿不成命并其  
妻子同梟首東市使羣鼠共穴即此意





